

Britainiarren erdiek uste dute Eskozia independente izango dela 10 urte barru

Eskoziako Alderdi Nazionalistak pozik jaso du 'The Guardian'-ek kaleratutako inkesta


Erredakzioa / Donostia

Alex Salmond Eskoziako buruzagi politiko nazionalistak pozik irakurri du gero eta britainiar gehiago direla lurralde horrek independentzia lortzearen aldekoak. Eskoziako Alderdi Kontserbadoreko kide batek, bestalde, polemika sortu du, independentzia lortuz gero Eskozia ekonomikoki aberatsago izango litzatekeela esan baitu.

BRITAINIARREN % 50ek uste dute Eskozia burujabe izango dela hamar urte barru, eta %60k hemendik 20 urtera. Halaxe azpimarratzen du *The Guardian* egunkariak atzo argitaratu zuen inkestak. Orokorrean, britainiarren %53k babesten dute Eskoziaren independentzia eta %30ek baztertzen.

Eskoziaren independentziaren aldeko britainiarren kopuruak gora egin du 1997ko datuekin alderatuta. Orduan herritarren %37k soilik ikusten zuten ongi independentzia, eta aurka azaldu ziren %45. Herritar kontserbadoreen artean, independentziaren aldekoak %14 gehiago dira orain duela hiru urte baino.

SNP Eskoziako Alderdi Nazionalistako buruzagi Alex Salmond pozik azaldu zen emaitza horiekin, Londresen egin zuen prentsurrekoan. Eskoziaren etorkizun «oparaz» mintzatu zen buruzagi nazionalista: «Eskoziak abe-



Alex Salmond, SNP alderdi nazionalistako buruzagia.

ARTXIBOKOA

Azken inkestak

	NOP	ICM
Laboristak	49	46
SNP (nazionalista)	28	30
Kontserbadoreak	9	13
Liberal-demokratak	11	10

* Apirilaren 12an NOP eta ICM enpresek telefonoz egindako inkesta. Beren barrutietan zein alderdiri emango dioten botoa.

rastasuna kontrolatuko balu, munduko zazpigarren herria litzateke aberatsean, *per capita* errentari begiratu-ta. Erresuma Batuko petrolio erreserben %97 dugu, eta, gainera, 2002rako Edinburgo izango da Europako laugarren finantza gunea».

Maiatzaren 6an hauteskundeak egingo dira Eskoziako Legebiltzarra osatzeko. Salmondek SNPren programa azaldu zuen, eta aurrekontuak igotzearen alde hitz egin zuen. Gainera, Eskoziak NATOtik urrun egon behar duela azpimarratu zuen.

Kontserbadoreen artean polemika

Eskoziako Alderdi Kontserbadoreko kide David McLetchiek polemika sortu zuen, independentziari buruz egindako adierazpenekin. Eskozia bere buruaren jabe izanik ekonomi alorrean aberatsago izango litzatekeela esan zuen, eta kontserbadoreek independentzia ondo ikusiko luketela. Hala ere, Eskoziak Erresuma Batuari lotuta jarraitzea hobe duela gaineratu zuen.

Kontserbadoreak «behin-goz egiaz jabetu» direla esan zuen SNPk, eta laboristek gogor kritikatu zituzten.

GRAPOk bere gain hartu du Valle de los Caidos-en egindako atentatua

■ «Erregimen faxistaren iraupenaren sinboloaren aurkako» ekintzatzat jo du

Erredakzioa / Donostia

HIL honen 7an Valle de los Caidos-ko basilikan (Madril) lehertu zen bonba jarri zuela ziurtatu du GRAPOk. EGUNKARIAra igorritako agirian, Urriaren Leheneko Erresistentzia Talde Antifaxistak (GRAPO) «Espainiako erregimen faxistaren» aurkako ekintza gisa definitu zuen atentatua. Bonbak basilika «txikitu» zuela ziurtatu du talde armatuak; tenpluko iturriek, ordea, aulki batzuen eta aitorleku batzuen apurketa besterik ez zuten onartu.

Agirian esaten denez, «Valle de los Caidos-ko basilika da erregimen faxistaren iraupenaren adibiderik garbienetako bat, eta beti piztu du masen gorrotoa, askatasun eta eskubide demokratikoen zapalketa ordezkatzeko duelako. Erregimen faxistak zutik dirauela argi erakusten du, 20 urteko erreforma demokratikoen ondoren, haren aurka gehien borrokatu ziren emakume eta gizon batzuk oraindik preso egoteak, ezarritako zigorra bete zuten arren». Halaber, GRAPOk gogor kritikatu du GALEko arduradun batzuei emandako indultua, HBko Mahai Nazionala preso egotea eta Jose Luis Geresta ETako kidearen «hilketa politikoa».

Beste atentatu batzuk

EGUNKARIAK jasotako agirian, GRAPOk beste zenbait ekintza ere hartu ditu bere gain: abuztuaren 5ean Bartzelonako COPE irradian jarritako lehergai-lua, azaroan Vigon eta Madril hiruan ABLEren aurka egindakoak, Laneko Segurtasun eta Higienearen Institutuan azaroan jarritako bonba, Kataluniako Patronalaren egoitzaren aurkakoa abenduan, eta Baix Llobregateko enpresari gazteen aurkakoa. GRAPOk erresistentziarako deia egiten du langileen alde.

Ipar Irlandako politiko unionista bat galdekatu dute

■ Orangistak haserre azaldu dira David Trimblek datorren astean Aita Santuarekin egingo duen bileragatik

Erredakzioa / Donostia

IPAR IRLANDAKO detektibek galdekatzen ari dira Winston Churchill Rea Alderdi Progresista Unionistako (PUP) kidea, Belfasteko komisaria batean. Royal Ulster Constabulary Poliziak ez zuen argitu zergatik itauntzen ari ziren politiko unionist. Rearen emazteak esan zuen, ordea, heriotza mehatxuak jaso dituztela azken asteetan.

PUP alderdia Ulsterko Indar Boluntarioa (UVF) talde

paramilitar loialistaren adar politikoa da. UVFk su-etena aldarrikatu zuen 1994ko urrian, eta PUPk Stormonteko bake elkarrizketetan parte hartu zuen iaz. Rea bera ere egon zen hizketaldietan.

Beste hiru pertsona ere galdekatzen ari da Ipar Irlandako Polizia, Esku Gorriaren Komandoa talde paramilitar loialistaren buruzagi izandako Frankie Curryren hilketa-ekin ustez zerikusia dutelako. Hiru pertsonak herenegun atxilotu zituzten Belfasten.

Orangeko Ordenako zuzendaritza, berriz, haserre azaldu da David Trimble Ipar Irlandako lehen ministro eta UUP Ulsterko Alderdi Unionistako buruzagia Joan Paulo II.a aita santuarekin bilduko delako. Trimble ordenako kide ere bada, eta datorren astean bilduko da Aita Santuarekin Vatikanon.

Trimblek arrazoi hau eman du bilera hori egiteko: «korte-siako dei» bati erantzungo diola, eta aukera bat dela Ostiral Santuko Akordioa Aita Santuari azaltzeko.



JOHNNY EGGITT / EPA

David Trimble.